

240.127
276
部三-4

萬曆新昌縣志

新昌縣志卷之十一



知縣田瑄纂

鄉賢志 理學 德業 忠節 孝友 義行

廉介 政績 教澤 文學 武功

隱逸 遺英 耆德 附封贈

恩蔭

志者於鄉之賢才類曰人物余以為泛也故易之以鄉賢新昌故多賢邑也其出而樹偉績播鴻猷龍光邦國者往往有之即家而處焉其窮理盡倫高行誼而善著述者亦種種備焉若而

新昌縣志卷之十一

一

人也胥足以為桑梓光志鄉賢

理學

宋黃度字文叔父仁靜淳厚有隱德度好學善屬文秘書郎張淵一見以為似曾鞏隆興元年進士知嘉興縣入監登聞鼓院行國子監簿言今日養兵為巨患宜使民屯田陰復府衛以銷募兵具屯田府衛議十六篇上之紹熙四年守監察御史蜀帥吳挺死度言挺子曦必納賄求襲若因而授之必為他日患乞分其兵柄不從後曦割關外四州賂金人求王蜀果如度言光宗

以疾不過重華宮度上書極陳父子天親且言
太白晝見占為亂兵入宮宜修德應天不聽又
言忠臣以孝事君臣父年垂八十菽水不親事
親如此何以事君冀以感悟上心天與臺諫官
勅內侍陳源楊舜卿林億年三人罪浮于李輔
國竊為朝廷危之皆不納度遂去寧宗即位詔
復為御史改右正言韓侂胄用事丞相留正去
國度具疏將論其姦侂胄假御筆除度直顯謨
閣知平江府度言蔡京擅權天下所由以亂今
侂胄假御筆逐諫臣非國之利也固辭不拜於

是大權盡出侂胄而黨論起矣侂胄誅寧宗思
而召之除太常少卿尋兼國史院編修官實錄
院檢討官朝論欲函侂胄首以泗州五千人還
金度以為辱國不可權吏部侍郎兼修玉牒同
修國史屢移疾以集英殿修撰知福州始至訟
謀日千餘度隨事裁決日未中而畢進龍圖閣
知建康府兼江淮制置使至則罷科糶輸送之
擾活饑民百萬口除見稅二十餘萬擊劇盜卞
整降之斬胡海首以獻招歸業者九萬餘家遷
寶謨閣直學士度以推轂人物為已任每曰平

生無以報國惟有此耳凡十疏引年不允遷禮部尚書兼侍讀趣入覲丐去愈力遂以煥章閣學士知隆興府歸越提舉萬壽宮嘉定六年十月卒進龍圖閣學士贈通奉大夫度志在經世而以學為本作詩書周禮說多闡精微之蘊著史通抑僭竊存大分別為編年不用前史法至於天文地理井田兵法藝祖憲鑑仁皇從諫錄屯田便宜歷代邊防行於世度以言忤當路御史勅度并其婿周南罷之與度俱入偽學黨今祀鄉賢

石塾字子重幼端懿警悟博覽群書有志聖賢之學年十八舉進士授桂陽主簿秩滿調同安縣丞民饑白府請蠲租如故事部使者委塾以便宜行事卒定蠲租之議改知武進縣有訟數年不決塾立辨郡守欲為寓客治第屬役於縣費且數十萬塾不從守怒欲中以法塾求罷歸更調尤溪縣時學校久廢塾命其友古田林用中來掌教事選其邑才俊充弟子員率佐史賓客往臨之開陳聖賢數學之方聞者莫不感悟他邦士子有裹糧來就學者塾視學舍不稱乃

廣新規制買書萬卷置田數百畝贍之更考古制舉行鄉飲酒禮於是士咸知學而民俗丕變及代去民畫像祠之監察御史陳舉善薦於朝丞相史浩舉名士數人整與馬有旨召對首陳人君之道與天地同大言甚剴切上皆然之累遷太常主簿代朱熹知南康軍未行熹使浙東聞新剡饑民轉入台境亟以屬整整奮義前往不辭勞劇民賴以全活者甚衆熹曰醇儒康濟之績也整天資高邁究心理學與熹友益講明經傳宗旨盡得其精與發為著述簡明醇粹多

與熹合所著中庸集解熹嘗采之為中庸集註又別為輯略以存諸儒之說而整尊經衛道之功明矣熹嘗名其所居曰克齋而為之記以著整求仁尚友之志一時學者多師事焉熹嘗呼之曰子重兄云及卒又述其平生志行之大者為之銘墓所著有文集十卷集周易大學中庸解數十卷從祀鄉賢嘉靖間郡守洪珠特建書院于鼓山崇祀而表章之

石宗昭字應之別號誠齋師事楊龜山與一時諸名賢友故其學邃而博登進士任無為軍教

授丞相史浩薦其學問操履文采政事四者皆過人改知長洲縣丞相趙汝愚復薦之引見擢舒州倅召試館職除秘書正字直文華閣宗昭志趣高遠學問淵宏而深自晦匿人推其賢朱文公嘗與論學有荅石應之書仕至福建提刑後贈金紫光祿大夫加特進

俞浙一名公浙字季淵號默翁登開慶進士授迪功郎慶元府教授主管尚書刑部架閣文字凡七轉官德祐乙亥除太常丞改監察御史辭不允三疏時事皆忤旨留中不行改除大理少

卿不就乃浩然歸閉門著述有六經審問五十餘卷離騷審問十卷韓文舉隅十二卷浙為人寡言篤行端矩獲肅衣冠莊重介潔清明夷粹不喜馳騫與石整黃度先後發明義理之學尤崇尚朱熹經書傳註所得良多晚年深察而擴充之以求合中庸之旨自號致曲老人兄公美進士子揚鄉進士泰定間郡守王亞中採訪理學行誼立祠褒崇風勵後進惜其所著書多散佚惟孝經審問尚存今祀鄉賢

德業

宋石公弼字國佐初名公輔幼警敏勤學厭時文獨喜論前世治亂與古人行事大略弱冠舉進士一時宿儒皆就質所疑公弼應之如響聞者歎服調衛州司法叅軍議獄多所平反後歷宗正寺主簿入見言朝廷比日直詞罕聞頌聲交作願崇正道遏諛佞通諫諍除壅蔽徽宗嘉納焉擢監察御史進殿中侍御史時三舍法行士子計等第頗事告訐公弼言設學校者將以仁義漸摩欲人有士君子之行也願使之相告言

非建學本意由右正言改左司諫太史保章正朱汝楫冒俸得罪內侍失察公弼劾奏矯稱詔旨宜並論如法遷侍御史言蘇杭造作局擾民之害請稍罷進奉從之蔡京嘗薦公弼公弼直諒不阿京忌焉徙太常少卿遷起居郎兼定王嘉王記室故事初至宮賜金緡二萬公弼却不受水官趙霆議開直河已而河決鉅鹿法當斬霆止削一官公弼論為失刑乃出霆京西轉運使蔡京當國奸回專恣臺諫皆出其門諸封事必先稟白然後奏御公弼劾京罪惡章數十上

京罷相又言吏員猥冗非舊制於是堂選歸吏部者數千員罷官廟者千員都水知埽六十員縣非大郡悉省丞在京茶政歸戶部諸道市泊歸轉運司仕途為清蔡京雖上相印猶提舉脩實錄公弼因星變言之竟出京杭州進公弼兵部尚書兼侍讀張商英欲引為執政不果以樞密院直學士知揚州改述古殿直學知襄州京再相謫公弼秀州團練副使台州安置赦歸召為右丞封開國侯食邑一千戶贈金紫光祿大夫卒列祀鄉賢

王夢龍字慶翔慶元三年進士授天台尉教授隨州辟為京西檢法官抵襄陽虜大入宣撫項安世得公甚喜咨以征謀一時書檄咸出其手士皆感動改尚書左銓知龍游金華二縣救災卹患惠於民甚厚幹辦行在諸軍審計司當對奏今氣節不振正道日靡正論日鬱次論中原倣擾惟當盡吾所以自強之實使動靜屈伸罔不在我除大理寺丞極言今日議論不明體統不一邊備所當嚴歲幣所當絕和好不可恃攻守所當嚴言甚懇切上嘉納之擢監察御史首

論媿阿苟容氣節不立士風大壞宜申貪墨之
禁陳時務之宜條上備邊四事曰扼衝要嚴策
應練舟師覈勝負又條備蜀四事曰足兵額置
帥貳修城池嚴關隘皆一時急務遷宗正卿以
歸養辭除直秘閣知温州以崇學校表儒先明
教化移風俗為務無何以母疾祈間知温州時
海盜集亡命殺人于貨乃諭海島諸豪俾伺其
出沒掩捕而磔諸市境中肅然主管建康府崇
禧觀知婺州撥官田一千七百畝為助役倡民
翕然各以田助得田六萬九千畝有奇以備當

役者用及議社倉規約大要祖朱子成法又以
積兩奏蠲二稅十萬四千餘緡以旱魃奏蠲二
稅二十萬一千餘緡詔赴行在論中庸致中和
如九官並命四罪咸服刑賞之中和也好賢如
緇衣惡惡如巷伯好惡之中和也又取慶曆名
臣余靖富弼論盜賊之說為上陳之除司農卿
權戶部侍郎以疾乞歸却掃觀書日與幽人雅
士賡詠自樂八年如一日年八十三疾且革口
占遺表自書其名釋然而逝表聞特贈正奉大
夫會稽縣開國伯食邑七百戶事母孝以荅春

名堂宣宗受禪推恩臣下不以官其子而以官其弟夢錫曰吾母所鍾情也其孝友如此晚憇龜潭人稱龜潭先生所著有西銘解諸書

石公揆字道佐幼有至性親歿廬墓三年含哀茹淡三年如一日舉進士授華亭丞進太常博士拜侍御史直龍圖閣初徽宗問宰臣曰公弼與公揆何親趙鼎對曰從兄上曰公揆大有公弼風歷殿中侍御史高宗朝疏論樞密使秦檜狼悞剛傲愚闇執辟罔恤人言恐威柄潛移陛下之勢孤矣章凡十上上諭曰別未有人姑少

待以直龍圖閣知撫州檜既相因前憾下公揆於建昌獄久不得罪廢錮而歿今祀鄉賢事載大明一統志

王煥字仲潛一字伯晦父夢得夢子游入室而生煥秀偉異常父語之夢即以聖門之學自勵登嘉定十三年進士知常熟縣敏達有循政通判泰州知滁州改知瑞州遷籍田令兼督視幹辦公事監三省樞密院門所至咸有風譽遷太府丞尚書左司員外郎秘書少監以人言出為福建提點刑獄溫良明斷清望彌彰差知温州

遷太府卿國史編修權兵部侍郎兼中書門下
省檢正諸房公事疏請大臣相與憂亂而思治
懼危而圖安俾內治明如日月外治勁如風霆
則世道昌物情洽上以迓天命下以固人心致
治保邦孰能禦之以右文殿修撰提舉太平興
國宮召赴行在授集英殿修撰樞密都承旨權
吏部侍郎同修國史兼太子左庶子極言正論
太子聽而說之上聞之甚喜遷禮部尚書權吏
部尚書加龍圖閣學士知平江府淮浙發運使
進端明殿學士知樞密院事兼參知政事再乞

祠祿授資政殿學士知慶元府兼沿海制置使
四辭不允以為左丞相尋授特進加食邑乞以
舊職奉祠右丞相章鑑參知政事陳宜中奏留
燾以鎮人心以康世道從之燾奏臣本志誓死
報國願假臣宣撫招討等職臣當招募忠義共
圖興復鑑宜中又奏乞遣中使趣還治事乃授
燾觀文殿大學士浙西江東路宣撫招討大使
置司在京以備咨訪進少保左丞相兼樞密使
尋加都督諸路軍馬累辭不許奏今天下所以
大壞至此者正以一私螭塞賞罰無章故也宜

大明賞罰動合乎天庥幾人心興起天下事尚
可為也極言賈似道誤國喪師之罪於是降詔
切責似道以不忠不孝斥之國是始明六月庚
子朔日食爚奏陰盛陽微災異莫大於是臣待
罪首相咎實在臣乞罷黜以答天譴不許尋進
平章軍國重事時命張世傑等四道進師陳宜
中留夢炎二相都督軍馬爚請一相建閩吳門
以護諸將不然臣請效死封疆不敢辭宜中夢
炎乃上疏乞行事下公卿議竟不決七月世傑
等兵果敗爚奏比者六月出師諸將無統大敵

在境臣請陛下自將大臣開督今世傑果以諸
將心力不一而敗臣既不得其職又不得其言
乞罷免乃罷爚平章依前少保特授觀文殿大
學士充醴泉觀使爚清修剛勁不阿權倖以元
老入相值國勢艱危天下屬望乃與宜中不協
而去不逾年而卒宋亦隨亡矣天下莫不惋歎
少傅葉夢鼎誄之曰公之經術中庸大學公之
典刑乾道淳熙公之踐履言行相顧公之出處
久速皆宜有真實而無飾偽有正大而無詭隨
行乎蠻貊而皆可質諸鬼神而無疑身雖考終

於牖下心實未死於泉扉斯言也可謂千古定論云

石斗文字天民整其從姪也登隆興元年進士任天台尉遷臨安府教授與文翁朱子為友書問往來丞相史浩薦其學問知方行已有恥不為詭激以事虛名改樞密院編修上書論朝政言甚剴切其曰朝廷譬如萬金之家必嚴大門以司出入一旦疑守者而朔開便門不知便門之私乃復滋甚一時以為名言因目之曰石大門除揚州通判改知武康軍晚號緝齋潛心問學沒齒不渝卒祀鄉賢

國朝梁貞字叔亨舉元鄉試授太平路教授端慤寡言沉深有識我

高皇克太平貞知天命有在率諸儒迎拜請歛戢軍士保養生靈復以三王之得天下者為上言之上喜曰老儒先生其言甚是留掌圖書與李善長同侍帟幄密贊謨謀日見親任上欲取金陵謀諸貞貞力贊之命都事江南行省遷湖廣按察司僉事尋陞兩浙都轉鹽運制敕褒之未幾拜太子賓客日侍太子讀書大本

堂多所啓沃戊申以本官兼國子祭酒設立科
條以課士 上遣官釋奠及命品官子弟民間
俊秀充國子生詔給冬夏衣廩皆貞所倡議也
事載南雍志中貞嘗輯古詩三百篇進覽 上
以賓之初筵命丞相直解 上喜悅感嘆飭勉
群工且命繕寫數十本頒賜大臣俾揭高堂以
為朝夕警省庚戌以老乞歸築墅鰲峯之下日
與鄉里宿儒楊溫如呂不用等賡唱不厭可謂
進有所為退有所樂者已

楊信民宋侍郎楊轟八世孫也民生有異質自

為諸生時便敷陳天下大事奇節英氣卓犖驚
人中永樂中鄉試宣德間授工科給事中出使
江西疏陳五事改刑科正統癸亥王文端公薦
於朝陞廣東左叅議招輯雷化高廉諸州劇盜
盡平時按察使郭智所行多不法劾罷之黃翰
代其任益甚又劾之二人比周遂誣詆信民俱
逮詔獄法司鞫實翰坐除名廣之士民赴 闕
為信民辨白者以千萬計 英宗北狩 詔以
信民守白羊口而廣東賊起信民乃以叅議陞
僉都御史巡撫廣東先是廣東都司囚黃肖養

逸獄嘯聚為亂守土官不能禦省城洶洶而鄉民避亂趨城者又閉門不納盡為賊所殲脇從者益衆攻城益急聲言楊大人家眷勿憂城破當護送還鄉廣人居京者聯名奏乞信民巡撫信民承命疾馳至廣城則被困數月矣信民開誠布公發廩振貸下令有司多方拊循給民木牌縱其出入賊見民帶牌者皆不殺曰楊大人所給也歸附者日衆信民素有恩德及民又知賊情委曲乃差能幹官吏各齎榜入肖養營撫諭肖養大喜簪花設宴約日投降信民單騎出

城賊數十萬人見騎出皆倒旗羅拜肖養泣下跪訴信民安坐諭以禍福即時投降者數千萬人越五日信民單騎復往賊投降者益衆未幾董都督統大軍來賊遂中變景泰元年三月五日有大星隕城外無何信民暴卒廣人聞之奔走號哭舉城縞素身陷賊中亦曰吾輩無生路矣肖養亦顛哀設祭事聞天子遣官諭祭謚曰恭惠其後董都督以大兵勦賊所過輒屠之廣民仰天大哭曰使楊大人在慘烈寧至是耶赴京奏請立祠奉祀者又數千萬人詔曰可下

有司春秋祀享歲有災祥禱之即應如響民有不平詞而祝焉亦應如響蓋信民一念忠貞可以質神鬼格幽明迨今數十百年其英烈耿耿猶一日也語稱忠信可行蠻貊難矣况盜賊耶夫人無不善之性天下無不可化之人信夫余述楊公之事竊有感云詳見丘文莊公濬所撰惠濟碑及皇明通記吾學集里中推祀鄉賢呂昌字好隆生而英敏祖九成奇之曰是兒必昌吾門遂名之既長慨然有志當世誦恥其君不為堯舜之語因以名齋舉進士授監察御史

監應天鄉試凜凜有風譽會南都寢殿災

英廟震怒 詔逮留守大臣昌抗疏論救言極剴切尚書魏驥稱之曰清風直節百僚竦然憚之遷福建按察司僉事時沙寇鄧茂七嘯聚陷城邑昌上疏乞貸貧民下捕盜令及盜平 詔賜金幣乃問俗明教請修朱蔡諸先賢祠下有司歲祀之遂為制遷江西按察司副使中貴葉鎮守橫甚其奴白日殺人市中昌捕得論死會淮邸責民子錢甚急昌視其券久入息多者即焚之葉又謾語激怒王王乃論昌侵侮宗室事下

御史御史素賢昌抗章訟之事乃白遷陝西按察使值邊備方亟民困供輸昌累疏便宜十餘事上悉嘉納陝西漢唐故都其謠俗喜佞壯巨俠司千戶貲雄一省怙勢殺人昌至言寃者數十百人司乃請昌同年姚太宰書抵昌昌按其事有驗即上狀逮繫竟斃獄中於是直聲振中外然濡徐不徙者數年疾且革乃召其子議議至而昌卒篋無遺裝僚窳以公錢賻乃夢議而告之曰吾為吏三十年未嘗私一錢也乃今欲以遺骨為利耶議覺而痛泣旦日即奉櫬

行巡撫馬文升聞之歎曰烈哉先生廉介似趙清獻慷慨敢言似唐子方蓋確論云正德中推祀鄉賢所著恥齋集與其子諶東臯稿並傳于時

丁川字大容成化間以進士授監察御史容頗而暫居臺中有才名奉命巡漕河起利除弊聲稱籍甚疏上政本聖學君心等六事又陳飭時政甦民困等八事上嘉納之總視法司奏牘檢覈各道違錯臺中肅然丁亥留都端門震上疏極言當修德以回天變魏昌侯孫繼宗以外

成視十二圍營子瓚掌錦衣衛事橫甚川䟽其
父子權重宜裁損之又劾尚書馬昂都御史楊
璿怠事不法時萬貴妃寵冠後宮干預朝政川
上䟽論諫罰俸三月成化辛卯

太皇太后崩因陵廟事遺 旨切責言者川䟽曰
諸臣之請天下公論也聖母之命一時私恩也
惟 皇上母以私廢公言甚切直事竟寢壬辰
擢順天府丞值旱蝗䟽救荒禦災十五事遷僉
都御史巡撫延綏至則上備胡三策開中淮浙
積鹽選將帥置弓弩練士卒創屯堡蓋隱然鎖
鑰重寄云未幾丁內艱卒于京師卹典有加平
生清苦卒之日囊橐蕭然鄉士大夫賙賻乃克
歸葬今祀鄉賢

何鑑字世光少岐嶷不群讀書過目輒成誦登
進士知宜興縣廉公有威革重徵運戶及額外
私茶邑人利之擢山西道御史抗䟽論度僧道
之非事遂寢查盤邊計論黜監司不職者數人
邊境肅然陞知河南府 朝廷勅取高盧鑛洞
慨然曰是貽吾民以無窮之害也執奏止之連
歲大祲人相食設法賑濟全活甚衆當道下其

荒政于各府以為式又䟽禦災十事上之士民立祠祀焉歷山東叅政四川左右布政使陞都察院右副都御史巡撫南直隸理杭嘉湖稅糧濬吳淞白茅等港所至事集再撫山東轉刑部左右侍郎奉命清查河南湖陝三省流民多方撫綏入編籍者以萬計陞南京兵部尚書與內侍劉朗魏國公徐甫同管機務朗劉瑾黨也橫甚徐惟唯鑑秉法不阿瑾以故銜之誣寘重罰上知鑑清慎召為刑部尚書尋改兵部尚書奉勅提督軍務賜蟒衣玉帶時承平日

又巨寇劉六劉七齊彥明等所在蜂起劫掠府庫戕殺守臣逼近畿甸規犯郊祀鑑處分守禦悉中幾宜上召至左順門面問可否鑑力贊車駕早出以安人心遂克成禮而歸諸將亦報捷至又奏行山東直隸等處修城隍以禦攻擊錄武勇以散賊黨立鎮柵以相應援守黃河斷太行以備奔突留操軍選漕卒以防運道奏用侍郎彭澤陸完等督理軍務駐臨清率時源許泰卻永等分道進討由是巨寇以次盪平進鑑太子太保勲階柱國光祿大夫恩贈三代蔭子

容為錦衣衛百戶時中貴冒恩傳乞錦衣衛官
至數千員蠹費殊甚鑑考選軍政多所革汰宸
濠潛蓄異志求復護衛鑑五覆奏罷之遂乞休
不數年內訌外構人服其先見云鑑寬厚簡重
喜怒不形而秉道嫉邪洞然涇渭敷歷中外幾
五十年矢志經濟不為家謀居憂時凡鄉邑利
病獨主有司興革之如築長堤請度田減軍需
革冗員改京運除徭役減畝里請賑濟併倉廩
修通衢之類皆公之力焉鄉人感德建祠肖像
歲時修祭卒之日雷雨晦冥訃聞 朝廷遣官
諭祭 勅塋所著有五山奏疏五山吟稿藏于
家祀列鄉賢

俞欽字振恭聰明異常讀書一日數行俱下為
文豐贍雄逸性和易謙抑自將而遇事周慎臨
是非利害剛正不阿始入鄉校或見其器識不
凡謂之曰是子當少年貴顯弱冠即舉于鄉連
第進士入翰林試庶吉士讀中秘書改禮部儀
制司主事陞郎中辛未春闈災左遷松江府同
知誌言其慈祥廉慎不尚煩苛及召還行李蕭
然改兵部郎中奉 勅紀功偏頭鴈門關會川

貴山都長偕九姓土獠作亂 上命大司馬程公督師而以欽參謀既至主帥以下咸謂戎蠻梗化不必耀武遠征惟宜設策羈縻之欽奮決不可主帥從之遂進兵連拔二十餘寨斬獲六十餘人獲銅鼓兵仗以獻師還陞太常少卿道流多夤緣郊祀得官欽奏裁革凡建白多允擢禮部侍郎從祭南郊與臨軒策士必先期齋沐會西邊有事改兵部左侍郎虜寇大同欽與二三大臣經畫處分邊境以安將錄其功竟病卒上聞之特命塋祭如禮蔭子一人欽居官三十年

歷事三朝始終一節特不能大施其用為可惜云祀列鄉賢

呂獻字丕文生有異徵大父竒之植槐以識既長博極群書張莊簡公稱其文大類杜詩從遊者數百人遂魁鄉薦登進士授刑科給事中校文南宮得費公宏蔣公冕皆昭代賢相

孝皇登極擇文學德望可使交趾者 命獻及劉戩賜正一品服以行竣事歸贈金悉却不受廉聲大振太監李廣怙勢受金以富兒為駙馬獻劾罷之又因災異陳八事如策大臣以咎天譴

抑親貴以昭至公尤人所不敢言者及

孝陵災抗疏直陳闕失 上嘉納焉時壽寧侯張

鶴齡兄弟倚官掖勢燠炙一時遊宴後庭出入

無禁獻反覆極論之 上怒廷杖三十詔錦衣

獄獻慷慨賦詩繼以其言直釋之遷禮科給事

中光祿卿趙鉉獻同年友賈緣驟陞劾之不顧

居諫垣章凡數十上皆切中時事擢應天府丞

時輦下多事獻剴決不留庶得筦庫者盜銀數

千衆驚以為神性寬仁見民當杖目必左右顧

民呼為父改順天府丞 武宗耕籍田日獻禮

儀閑習欲以為尚書逆瑾索賄不遂十年不調

丁內艱服闋轉府尹陞南京兵部右侍郎明年

捧表入賀瑾揚言將中獻竒禍知獻者以告且

勸解官獻曰死生有命君事不可廢也未抵京

而瑾譴死矣人以為獻所處有劉安成之風云

未幾引年乞歸獻居官廉介三十餘年止構一

宅因扁曰遺白堂為給諫時有功及鄉里而不

自表襮也曰吾以陰德遺子孫耳性至孝既貴

父對坐客獻侍立終日始新昌未知學不究宗

旨獻研精殫思著為經書定說學者得一二語

輒高第又長于詩文善草書所著有甲軒稿使
交稿卒 朝廷遣官御祭蔭其孫一人嘉靖間
列祀學宮

俞集字汝成第進士初任長洲知縣首除稅外
羨銀千餘兩誌稱其節愛多惠政丁外艱復補
蠡縣 聖駕南征集迎於定興之北供給周備
應對明敏用是才名益著召為河南道監察御
史巡視京城首疏四事大率請省國用以蘇民
困 上嘉納之侍文華殿經筵 上言群臣輟
講當賜坐從容詢問民瘼毋徒事虛文奉 勅

查大同諸邊錢糧因言太監蘇進劉祥等效尤
罔利宜寘之法江彬怙勢作威往來邊徼侵侮
巡撫重臣請假便宜以重其權從之使還抗疏
大學士楊一清在先朝蟠結黨與善交近侍有
四維不張之弊不宜復相御史何棟以失儀調
外集謂不宜疏遠諫臣上疏救之又疏太監于
經等乃三張黨與不宜叙用以啓他釁已而巡
按河南大和賊黨劉現等嘯聚為亂集隨軍紀
功激勵將士卒討平之奉 勅嚴督漕運又奏
地方彫敝已甚請捐內帑賑恤量加減免既而

通許諸處民饑復奏起運不蠲雖給內帑民終
無濟乞將查出贏銀七項分給不報集在河南
殫心經畫奏章成百可謂不負言官也已其他
因地震而勸修聖學抑宗藩以安民庶皆有稱
於時集為人天性鯁直心事磊落卒之日家無
私藏有司祀于鄉賢而長洲名宦誌亦有傳所
著有西行贅錄隨筆錄中州巡稿奏議雜稿藏
于家惟旗峰詩集行世

忠節

宋董公健字伯強雪溪人宋宣和庚子冬睦寇方臘起桐廬焚掠州縣蔓延新昌有五千餘人當晝入縣官吏奔竄莫敢當民望風響應賊寨布滿公健慷慨奮往率子弟與鄉人密授方畧聚兵萬人遂破賊焚寨斬首級以千計平民全活者無筭是役也不煩王師遂復故邑公健素以剛直庶正見推鄉黨及守禦戰陣紀律嚴明所得賊貨罔敢自私由是人心益加畏服既而王師討剡西賊起公健為先鋒公健藉累勝之威

輕視逆黨以數百兵當數千衆殺獲甚多賊咸奔北已乃王師不進勢孤援絕公健度事不可為呼衆語曰大丈夫當以義死不可苟生遂自殺人皆嘆息垂涕贈武功大夫汝州團練使今祀鄉賢長子授蕭山尉次四子皆承節郎

石待舉字寶臣幼竒偉有氣節博學能文初為父渥卜兆既得卜術謂不利幼子諸兄疑未決待舉曰父得藏身奚卹其他手持菴鍾以前遂克塋既而第進士知上饒縣政明刑清一邑大治天子降詔褒諭之會河陝用兵詔除通判保

州先是州有雲翼軍數千人俱隸沿邊巡警當用武時精銳驍悍故廩給特優治平間復領以中貴人訓練無法偃蹇日甚待舉下車條奏其事乞均廩食且以武臣領之驍卒往往怨語中貴人武繼絳罷去武臣俞貴代之貴本侯家奴以主恩得官怙寵恃勇與中貴人構怨卒乘間鼓譟劫庫兵為亂待舉聞難徒步率州兵得數百人與州將劉繼宗巡檢史克順討賊轉鬪於市賊鋒銳不可當克順降之州兵潰待舉與繼宗脫身登堦招集潰兵謀復討之叛卒乘城繼

宗死於隍中待舉為手書縋城求救於定州左右具筏請渡隍待舉曰食其食死其難義也爾曹欲吾苟免非臣節遂遇害

吳觀又名公一字叔大其先有名濟者仕吳越為御史中丞宋初棄官居新昌鄉人為之立祠觀竒偉有氣節嘗築桃溪義塾以待四方學者故能大肆力於文章業成入太學上書言邊事不報景定庚申試六師大振天聲賦遂補稽山書院長未幾元兵南下與同舍陳非熊謀輔宗室節度使某固守以保越事覺咸請遁去觀不

聽兵至城陷就執總戎諭之使降觀曰吾宋臣當守臣節且吾不以死懼故至此事之成否天也陳非熊既死吾可獨生乎終不屈遂遇害子班負骨歸塋後祀鄉賢班痛父死能孝養其祖父母人咸稱之

陳非熊一名煥字思齊業儒有氣節與吳觀同試六師大振天聲賦授稽山院長元將伯顏南侵朝議不協太后詔降恭帝北轅檄報慟哭即與觀謀奉趙節使圖恢復率家人集義勇千餘繕城固守元引兵薄城令張白虎招降非熊叱

曰汝曹逆酋反招我降力戰而死弟羆彪虎子圭墜姪墦坑數十餘輩皆被害惟子墦留新昌獲免痛父死難屏居讀書後至元十四年婺寇掠新昌邀擊陳宣尉墦率宗人赴援聞宣尉死憤激決戰皆歿于敗兵嶺可謂世濟忠烈云後人賢之推祀學宮

元董旭字太初公健之後也少負英氣博通群書與邁里古思最友善古思欲興師討方國珍臺臣怒其不稟命殺之旭作詩傷悼其辭極哀楚遂歸隱山中居無何國珍據台慶強欲羅致幕

下旭拒不受乃作詩曰

鬱鬱芒碭雲未辨蛟龍形
熒熒祥星光未燭夾

馬營君子慎其微草露不可行
國珎復強之終不屈又作紙鷓
詩云爾形外假其中澆骨本非
骨毛非毛牽連作隊小兒戲舞
弄直上青雲高只恐天瓢降霖
雨濕爛破碎歸荒郊遂遇

害

董曾字貫道旭之弟也少年學丹青術嘗訪鄉先生潘喜坐客以畫士鄙之曾愧甚即焚其畫筆拜喜為師而受學焉不三年通習經史元末兵亂不求仕進乃為古文為先輩稱許方國珎偕據城邑欲官之不受遂避居東陽山中

新昌縣志卷之七

七

無為州遇陳友諒寇城被執不屈而死州人立碑頌德有詩集天姥山賦行世今祀鄉賢祠子荆別有傳薛登進士官御史

黃與東不知何許人舊志稱其舍生取義人有吊之曰名隨身共沒心與義俱生今不能詳其實矣惜哉

孝友

宋石衍之字克美幼穎悟舉進士調懷仁縣尉其父待舉通判保州死雲翼之難而賊以窘降詔原之衍之徒跣詣闕乞誅賊書五上不報衍之追慕哀瘠既終喪無任意或勸之行迫于母命調弋陽清流二縣多盜賊衍之授方畧捕而寘之法境內以安為僊居令以父之故忽忽不樂移疾不行荆公當國使人諭意不答遂調長興縣丞而歸元豐三年以大理寺丞致仕卒

呂蒙字仲晦事親至孝痛父集早喪安葬邑之

杜潭不忍舍去居墓下久不返子琰以父年老遠居苦淡自抑憂懼不已乃即母所塋曰龍巖謀築室其傍將迎居以便終養時紹興戊辰也屬歲饑米斗千錢琰解囊糴于京口度其還可

以畢事無何米舟沒無遺粒而歸琰不以為意畢力成之乃迎父其中蒙感母修齋禮佛亦蔬食終身一日焚香危坐而逝合塋龍巖琰克終大事悉以家務屬諸子日居龍巖舊廬戀墓不返榜其廬曰報慈用父詩句也每至諱日必哭泣盡哀如是者積久不懈後以子元之等貴受

封塋於陳巖陳止齋為銘墓

元石永壽字德遠待且十世孫性淳厚事親至孝元末兵亂父謙孫年老被執兵欲殺之永壽亟抱父求以身代遂殺永壽父獲免鄉人哀之推祀學宮事載大明一統志

國朝胡剛字惟輔行車司馬胡璟裔孫也生有至性洪武初其父坐累工役泗上以躲工事覺當刑勅駙馬都尉梅伯殷監斬共八十二人時剛往省代役於待渡間聞其事遂裸跣泗河而渡奔走懇訴求以身代言與淚俱情甚哀切梅

憐而奏之特蒙恩宥父子皆全而同事者俱免淮人德之至今相與傳頌云

呂升字德升事父百歲翁至孝幼失母遂不入私室與父同寢務悅其心父年高齒不任堅每食盡肉一斤升率妻子供飪必極精爛父出入必呼升隨或適旁近舍升不隨行則不往若嬰兒不能頃刻離其母然父年益高便液不時升承順益謹夜嘗四五起遭元兵火升負父避鷓鷯山出覘賊為所獲知其孝子也善視之與食飲不入口輒泣下賊亦憐之令歌升為青天歌

浩浩歌歌已輒泣夜令擊刀斗升為思父嘆賊
感動縱之歸升夜行晝伏凡三晝夜還家扣戶
侍者以為鬼物父之啓戶乃升也相視大哭出
其足芒刺一握升園有美杏父所嗜鄉豪竊之
并奪其地升為文訴城隍神即譴豪疽發背曰
還孝子地乃已豪妻子匍匐叩門還地疽即愈
其孝通神明感盜賊若此

大明洪武應孝弟力田詔授江陰主簿辭不就乃
以布衣奉使山西三十三年再徵入覲又辭歸
自號小小齋曰半村臞曰沃洲耕釣者升天資

龐厚神氣冲和而儀度凝然讀書究大旨嘗手
抄六經親為箋註初年義不仕元惟家居教授
與姪不用九成歌詠唱和士大夫東西行必訪
問小小齋升即留信宿酌酒論文日夜不倦有
小小齋稿載浙江通志卒祀鄉賢初升有妾既
遣而生男子于外長子珮潛收養之至是次子璉
卒父感傷珮因見其弟於父相見甚歡其先世
曰蒙曰琰俱孝時稱四孝子云

吳希汴字克素性柔順恂恂謹畏事父宗信承
順顏色務得其懽心洪武初捕民斷指者戍遐

方其父以疾失將指之半里長懼連坐將執于官希汴憂形于色會有善接指者人弗之信希汴獨心喜乃截右足小指接父將指彼此血出淋漓月餘瘡愈指果續已而瘡復潰斷指如故希汴顙天誠禱復截左足小指接如前法血交氣貫一指宛然如生鄉里驚異以為孝感所致云

章衡民名灋以字行舉洪武鄉試銓賜第二人賜衣二襲授建昌府教授灋早喪父竭力奉母兄卧病躬侍湯藥及亡敬寡嫂如母撫兄三子

如其子後母嫂相繼病亡父弗克葬灋晝夜悲號隣里皆感其誠而賙賻之衡民早卒子以占甫九月妻俞氏鄭氏皆克守節教成其子中順天鄉試第一云

俞壽字本初生有美質垂髫即能讀書善屬文及長從董貫道學性孝友父母沒哀毀踰禮弟兄相繼失明迎醫療治不愛錢帛妹氏將嫁知其以奩約不樂行也悉出妻所有益之再從昆弟有強取壽田租數百石避去者召之未歸具酒食設床幃與同卧起以慰其心元末仕永嘉

尉

國朝召授成安丞調營道臨邛二縣以事謫大同未幾復膺召未赴而卒所著有隨寓稿

章良民字士良幼失怙恃悲哀思慕人見而憐之其兄山民盡心撫教為弟子員窮經博史安厝父母竭力殫貲悲哀若袒括時膺貢入太學除刑科給事中夙夜惟勤出納敷奏必允糾正闕違一無偏黨奉命行寧藩冊封禮遂掌科事九年考滿卒

章蕝字希盛三歲喪母石氏即悲啼不食既長

新昌縣志卷之十一

三十一

事繼母趙氏如事所生正統丁卯父感風疾異常蕝爬搔撫摩扇枕席執藝器辛勤服勞終夜弗寐如是者五六年一日父握筆書紙曰蕝真孝子吾無以報惟愿汝無我疾汝子汝孫常如汝孝既而父病轉劇蕝益恭謹承順扶掖導引靡間寒暑晝夜迎醫禱神惶惶涕泣若小兒狀形容枯槁手足皸瘃弗之恤如是者又十年父沒水漿不入口泣血三年忌日必哭泣如初喪後督學鄭公瓊廉其事特造廬存問載之修學碑記中以風勵諸生云

張觀僧字子用元季隱居不仕父目雙瞽奉養不衰至正中寇亂居人皆驚走骨肉不相顧觀僧謂其姪德邦曰吾父失明汝父多病吾與汝家貲不暇顧矣救父為急脫有不幸當以身代可也德邦然之乃相與各負其父逃避鷓鴣山中俄而賊至揮白刃索金欲殺之二人叩頭流血請以身代父賊感而釋之父子遂得俱全父歿廬墓三年有風木倍淒情空咽松間月之句為世所傳

陳大禎字景瑞三都研頭人不學而性至孝父

懷仁感心疾每發狂輒痛捶其子大禎負杖受捶惟謹父尋悟而止且病瘵性好不常隨山水無不負之登涉如命坊市劇戲亦負父嬉嬉以觀衆以陳孝子目之父偶食肉索蒜妻有靳色遂出其妻後父以為不可乃迎還一日父謂曰吾佯死汝試哭禎初難之後竟長號悲不能止隣人聞之詫曰汝父痴子亦痴耶禎曰吾念父終不免此故不覺痛心耳待弟景通極友愛有司屢加存恤旌曰孝子之門

蔡丕承字繼廣性聰敏涉獵經史善詩文純孝

天植父嘉謀正統初戍遼東金州衛承痛思日夜涕泣奮志勵學將祿仕以迎其父未幾父病卒丕承聞之哀毀幾絕哀經徒步至遼東得父屍抱哭又幾絕扶柩歸葬鄉名士咸為詩歌贈美之由歲貢任九江府德化縣教諭正己以率人有蘇湖安定風成就發科為名卿者甚多皆推本教澤立碑紀去思葬王婆亭劉忠器撰誌張居禮字節之邑學增廣生因父病棄業歸養及父卒哀毀踰禮卜葬豫營欲廬墓次母史氏止之曰我父病不欲汝去左右乃攢父淺土侍

母左右二十七年非母命不入私室母有季弟素鍾愛死之同處以慰母心仲兄攬解舟覆失官銀六十餘兩有司督急母以為憂居禮易已田助償之母嗜魚於石坂拆屋為池身自芟草餵畜以供甘旨人名曰孝魚池母年九十八而卒合葬柘溪廬于墓悲哀如初喪時疫大作死者相半人皆避之居禮心未嘗動災亦不染人謂誠孝所感云有司屢賓之鄉飲及卒監司孫公移檄榜其名於旌善亭

章良駿醴泉人早喪父其祖章存貞病瘋手足

拳學不舉駁日夜不離左右梳櫛揩拭撫摩疴
癢靡所不至家貧極力為具膳羞多含伏以飼
煦煦然如哺嬰兒狀每春和輒背負以行柔聲
怡色冀得其懽凡十歷寒暑弗輟祖病轉劇加
痢駁侍疾愈謹手為之拭穢無難色祖對衆每
每涕泣為言其孝一日病稍愈承命他出祖扶
杖園中蹶于溝坎不能起駁忽心動驚悸奔歸
扶救蓋其心無時刻不在祖旁也祖年八十四
終殯葬以禮人稱順孫而監臨有司歲加獎勸
焉

呂好和名樂性至孝父歿喪祭以禮奉母及祖
母曲盡愛敬母疾籲天祈代煮藥和羹幾裂膚
爛指嘗出貲以調族貧遇吉凶事悉為處分里
有爭多就質之名儒吳與弼題其卷曰中和妻
章氏冬夏具茗粥饑饉渴者人多德之

潘憲朝本名楠號璞庵少志學幾成以父百歲
翁久瘡遂棄業終養教諸弟撫遺孤咸承順親
意母喪哀毀廬墓兩月餘以父獨處歸奉之朝
夕孝養備至父感足疾年已七旬猶躬調藥食
扶起居性剛直不苟取與至賑貧貸逋還遺金

多人所難能者邑令累以孝義旌之詳見都水
員外俞振強狀子日輝日章日新等七人俱以
文行稱于時

俞大漢幼失生母事嫡母黃以孝聞母病瘋卧
不安席漢橫身床蓐俾母足加其上手不輟摩
撫口歌謠以適其心便溺下親為拭席滌器晝
夜靡倦既沒哀慕終身諸當道旌其門給冠帶
粟帛年逾九十卒

義行

宋石待旦字季平其先京兆人大父元遂檢校太保自會稽徙居新昌待旦登進士志氣異常人勇於為義隱居石溪山水之間首創義塾三區以上中下為別身自督教衣廩之四方來學者甚衆類皆當世名士登顯宦者接武宰臣以其文行聞於朝大加褒異相傳賜待之景公問宗孝正奕祖十字為其子孫名范文正公守會稽極尊禮之稱石城先生而不名聘為稽山書院長四方受業者不可紀時傳文呂杜韓四公皆出其門後以子貴贈開府儀同三司刑部尚書卒祀於學宮子五允之亞之溫之秀之皆仕修之不仕

石賀太平興國中知縣張公良立縣治建邑庠百姓騷動賀為出財代其費百姓德之及公良卒不能返喪賀又獻地塋之今北門外曰官阡是也

石待用字用之任大理評事遷衛尉丞累贈工部尚書金紫光祿大夫為人剛毅沉厚幼鞠于諸父以孝謹稱長而才敏治家饒裕有東南築

室聚書延師以訓子第二十年間登第者幾二
百人又躬自儉約仁於施與姻族孤貧悉爲婚
娶長子牧之孝友有聲別有傳

石亞之景佑元年進士唱第時年十七丰神秀
整天子竒之將以尚主使卜其意辭曰親老願
歸養且議姻久矣王姬非敢偶也遂不强仕至
太常博士以惠愛配享吳山廟

石公轍字道叟爲人重交敦義初入太學有同
舍生朱夷行寢疾無親黨公轍爲謁鑿治療既
不起其弟昌言聞訃告質產迎其喪時棺未辦

方憂不知所爲而公轍已送柩在門矣且買舟
助之歸初公轍有目疾在舟遇暑轉劇幾喪明
忽夢夷行如平生曰目疾柰何有爾朱先生藥
如神覺而異之至京口岸濱有言爾朱先生者
公轍因與叩訪不百步已至其處款門求藥出
百餘貼皆細如芥子公轍盡買服之瞳神洒洒
如注水未幾而瞻視已清復初矣登紹興二年
特奏狀元知江州改建廟學置田養士官終朝
奉大夫大宗正主管宗室財用後年八十手自
校書燈下作牛毛小楷如年少者人謂真報云

事見郡志

石悅可幼穎悟以英傑自許嘗論人物獨推諸葛孔明宣和辛丑方臘寇縣悅可率鄉兵平賊以功授修武郎以讓其兄久可子斗文以諫諍名晦庵先生爲作墓銘

陳祖字惠鄉生紹定間居僊桂鄉之平壺爲人器度弘遠少喪父兄善治生業母疾嘗藥具膳孝敬不衰敦睦宗黨力行善事一日慨念人生服食外役役不休以財自沒吾所不取乃創立桂山西塾齋堂厨廡森列聘致鴻碩聚生徒學

業其中凡饗膳薪水僮僕給使咸具焉歲費錢蓋萬緡計弗少吝以故作人極盛文科武選往往不絕同舍題名石碑至今可考其他義舉甚多不能盡錄焉

陳雷字震亨祖之從孫也繼立桂山東塾去塾有脫衣亭客至先盤桓于此張即之爲館賓榜曰洞門無鎖鑰有客不妨來由是四方來學者日衆門牆冠蓋相望而雷賓禮優給之亦如西塾故事云又嘗置義田義役義倉義井義阡義局以賙卹鄉黨人甚德之以恩補登仕郎凡三

辟皆不就卒祀鄉賢

里生俞億等七十六人為文弔之其大畧言自義塾

興遠近之士蒙彼教育皆擬巍科躋顯仕推所講明為致澤事業其在新昌士勵節操鄉恥浮薄皆義塾之所倡率作成也○吳江莫旦曰嗚呼其哉天理之難憑也以陳氏為義若此宜其子孫世享無窮之蔭今二百餘年索然衰歇所謂義塾義庄皆鞠為茂草過者為之徘徊而興嘆幸而存者不過文字數篇而已天理果安在哉然君子亦惟盡所當為盛衰隆替弗論可也

國朝

翁玘字彥光領鄉薦授常熟訓導設教有方

多所成就陞淇縣教諭性尤篤于睦族弟姪貧乏者咸為畢婚娶人多賢之

俞黯字用直有器量嘗讀書見有古人異行慨然慕之念父哭祖喪明每相與笑歌為娛樂鄰

新昌縣志卷之十一

二十九

舍失火將延及黯急負抱神主以避伯兄剛厲謹而事之嘗謁止水廟拾遺銀五十餘兩待而還之詢其人乃赤城夏氏子也夏願留其半卻而不受止宿于家具鷄黍食之因相結為通家又嘗儲穀以賑貧乏正統初歲饑黯傾廩濟之即焚券曰無令子孫知其名也因稱曰惠迪翁蓋取惠迪則吉之義云後舉祀鄉賢

廉介

宋俞公美名瑞為人英敏特達學博文古力貧事親凡奉養送終之事不分責兄弟就試南宮知貢舉真德秀奇其才登進士授樂清令通判慶元居官精勤明恕不爲勢利屈性不喜自辨不芥蒂于讐怨平生困乏未嘗以貧語人至老益堅忍無戚戚意間有指捷徑諷者寧不遇不屈弟公浙稱爲籌山先生

國朝宋琰字尚圭性穎敏好學涉獵經史永樂間以貢授九江府通判蒞政六載一以公廉自持

內旨

勅造廬山廟出帑金萬餘琰用其半餘悉封還朝廷一日其子由任回行李蕭然惟二竹籠移檄新昌縣儒學開發乃花梨板七十二片題諸賢牌位都憲陳智表其賢擢貴州思南府知府清操愈勵以事親不能躬盡孝養扁所居曰盡思堂嘗于宅傍植棗一林謂子孫曰吾以木奴千頭貽汝而已他奚望耶入覲卒京師子扶柩歸葬今祀九江府名宦贊其孫也

劉忠器字世用登進士授永安知縣改崇仁擢

南京御史奉命巡江終太平府守爲人清苦自勵不可干以私舊蕭山令鄒魯性貪黠雖爲讐家瞽其日益橫專持守令陰短以行其貪忠器待以禮餽贈一無所受屢有干請皆却之有魚池利甚博魯乞佃忠器即命魚戶分掌收其利以給學徒魯雖善訐卒無可指摘者居鄉出入徒步自登科至貴顯匹馬隻夫不以煩縣或以爲舊例當得忠器曰吾無一毫及鄉里敢勞費之哉居常惟以一園蔬韭自給卒于官殞殮外筐廩無餘物子孫貧乏有不能自存者鄉人至

今推服之

俞振才字仲才初名鑄少侍大父聞歲旱里人饑即應聲曰何不發倉廩賑之大父竒其志登進士授行人

孝宗登極振才頒詔川陝自公燕外凡贈送一無所受復命掌襄藩喪禮行事一循舊典不科歛而事用集擢廣西道御史巡視中城朝房失火總兵官不能防守振才劾其失職遂爲所銜誣事下錦衣獄竟得釋凡朝政闕失必上章論列不避權要直聲著聞巡按貴州四川風裁愈勵

高皇帝時學士宋景濂謫蜀卒于夔州藁葬淺土
振才爲改葬成都題曰宋學士墓陞湖廣按察
副使初臬司有淫祠惑人胥吏以下不敢近振
才至立命撤之所惑遂解兩按藩王獄能以法
裁抑之人咸稱服事二親侍立終日不倦敦睦
宗黨急人患難不以存亡二心好讀書吟咏所
著有皇華內外臺集湖南湖湘詩文稿新齋集
藏于家推祀鄉賢

政績

宋石晝問字叔訪公揆之子也父爲秦檜所陷年十四奉其母李屏居苦學不敢應舉及檜死乃抱諫草扣闕訟父寃詔復職恩補將仕郎銓試第一轉脩職郎監造船塲充湖廣江西京西總領幹辦大軍庫秩滿改知鄞縣治爲浙東諸邑最遷軍器監丞輪對稱旨特命增秩召爲司封郎官懇辭主管武夷冲佑觀晝問平生居官不苟多會計四方財貨然盡心職業錢米出納不爽毫釐鉤校叅驗具得其實及論兩淮榷塲互市營田官庄之弊擇人久任搜訪不求聞達之人皆切於時務其爲慮深遠類如此居家歲以三百斛給宗族之貧者疾革對其子宗昭申言之官至朝請大夫

石牧之字聖咨姿韻沉雅嗜讀書第進士試校書郎移天台令已有能名時王荆公知鄞縣陳古靈知僊居號江東三賢宰九遷至朝議大夫最後知温州有母訟子逆者牧之爲勸諭卒成孝子鹽城海寇得壯士教以兵杖寇聞俱竄去永嘉病火民利歎欲牧之嚴爲約束弊遂革郡

有通衢又塞俗傳聞之不利立命撤屋開路所
著有往生錄易論解雜文歌咏共七卷門人葉
經序其始末尤詳云

黃允字和之登進士授汾州靈石縣簿居巖谷
間艱於稼穡允教以樹藝民賴以養咸生祠之
以課最改撫州團練推官知德州平原縣古田
縣所在有聲熙寧中管勾荆湖營田水利檢覈
侵漁䟽理淤塞盡心民務蓋古之循吏云

石景術字順思公揆之父登元豐五年進士入
試時有五考官同夢之異呂吉甫遽以女妻之

授天台尉歲歉即賑饑民民有貰酒不與奪而
往酒家擊之斃令欲論死術曰奪酒盜也安有
擊盜而罪死者乎初令以其少易之至是屈服
移僊居令民傳有神居解舍景術命撤去淫像
居之自如凡七轉官至朝奉大夫又善事其母
外家艱匱爲買宅分俸贍之

呂秉南字景陽幼孤受經于其祖冲之冲之受
經于止齋陳傅良學有淵源秉南穎敏夙成神
姿秀雅舉進士授福建崇安縣尉漕司遊委福
州校文品題精當人人歎服調寧國法曹獄無

停囚校勘涇縣版籍別疆理清賦稅法行而公
私便之未幾丁母憂復除吉州吉有劇寇莫能
禦秉南集丁壯授方略數月掩捕殆盡部使葉
夢鼎賢而薦之除淮南東路檢法官夢鼎猶以
爲未酬其功也尋改昌都令盜攻陷州縣秉南
據湖死守出奇銳擊走之民賴以寧授尚書省
茶鹽檢閱課最遷進奏院點檢南宮試榜一時
尤稱得人入預輪對以正君心明道術爲急務
語極剴切遷大理寺丞尋遷司農卿固辭不拜
即日渡江歸明年主管僊都觀朝散大夫賜緋

銀魚袋居家孝友善教子弟升膠庠取科級者
二十餘人秉南資兼文武學有師承歷任艱難
咸底成績乃以直道齟齬不究經綸之業惜哉
所著南明稿十二卷載兩浙通誌

王華甫字君實王煥之弟性嚴厲登進士初宰
黃巖有宗戚號難治甫到任見我冠數十輩聚
廡下詰之曰觀政甫曰縣政繁劇難卒觀命籍
其名約兩月觀之皆愧服知台州治豪貴呂省
蒼籍其家聲稱籍甚除浙西提刑奏劾郡守朱
斗山等皆戚里內降欲回護之終不奉命寢疾

俟得旨乃已

國朝章以善名樞以字行登進士知杞縣初縣因於輸賦以善第為三等量貧富約遠近以定役之輕重民皆稱便陞惠州同知事載大明一統誌

呂九思字時學美丰儀多才識初避方國珎亂讀書石鼓山中絕意世用洪武癸亥以聰明正直徵試稱

旨奉

命糴粟賑貸歛散有法公私便之已又勘理江西

新昌縣志卷之十一

四

叛軍計擒首惡而辨釋誣逮者數百千人能聲益著授袁州府經歷尋遷刑部照磨持法明允不幸誣誤而終無諄言聞者壯之

呂童字邦用治春秋貢授揚州府興化縣知縣自宋范文正公為令移風易俗至今猶有先賢之遺化童履任旌異節除宿弊百廢具舉豪吏蘇奎鄧信關節通巨鑑視令丞若僚佐童包含歲餘一旦盡發其奸

奏而磔諸市境中肅然日與民墾田闢野治溝洫脩鄉校訓誨其子弟治化孚洽蒞官十三載始

終若一日民愛之如父母童嘗以公事註誤士
民赴闕陳懇詔復其官部餉東南事竣還
縣以勞瘁卒吏民哀痛如考妣朝夕奠哭者千
數與文正並祠名宦童有識鑒一見高文懿公
穀於童穉中即以宰輔期之高感激知遇終身
執弟子禮為童撰墓志銘述其惠政甚悉見一
統志

章敏字以達幼端慤不喜嬉狎稍長篤學工詩
文有古作者風善事父母孝敬備至母嘗病癱
仰天號泣願以身代侍湯藥衣不解帶母終哀

毀踰禮待昆弟克篤恩義舅氏朱晚頗不振為
築室置田于南塘以贍之卒為塋先塋之次以
貢授刑部主事是司號為繁劇敏究心獄事辨
決不留累陞郎中益精斷讞獄囚反司刑者懼
累凡在獄率嚴刑以速其斃敏曰彼雖麗辟國
有典且在獄者即非反何用笞為囚皆感泣用
大學士高穀薦擢貴州按察副使夷民荒遠難
畫繩以法敏每事必持大體行部布令嚴飭武
備崇脩學校禮賢德戢豪強識者謂其寬猛適
宜是時苗賊猖獗攻圍城堡阻絕道路饋餉莫

給敏設策建議開道川播之路而總督諸官始
獲達境兵食稍足賊鋒屢挫諸城圍頓解軍民
賴之以年乞致仕進階亞中大夫歸劄花鈿庵
捐田置漿以便行人云

甄完字克修幼穎異家貧力學蕭山魏驥甚器
重之比長登進士第初拜刑部主事時高庶人
叛逮捕株連無辜完為詳讞全活甚衆轉負外
郎出為廣西叅議廣西故百粵五嶺之地夷獠
雜處多瘴癘戍兵死者相籍完奏易以土人兵
不耗折又建議營田于近地以免轉輸之費從

安遠侯柳濤征大藤等峽斬獲甚衆

上嘉其功賜以文綺臧獲初廣西民出粟仰給靖
江王府祿主倉廩吏怙勢奪取民罄產不償完
為釐算疏請革之景泰元年轉湖廣左叅政時
車駕北狩廣東盜起湖南大震完既督運以給
東兵輒以便宜往來視師從克香爐諸寨卒以
功拜河南左布政使河南七郡水旱相仍民多
流殍完至發倉賑貸奏蠲夏稅其活民以千萬
計黃河經汴城堤壞田廬亭竈悉淪沒危及城
郭又張秋決浸淫數百里運道不通完佐都憲

徐有貞修築日夜不倦堤成而河患息其任方岳前後凡二十年皆有惠政及民時

朝廷遣六部按行天下考察獨甄完所治不復命考因使少保于謙諭意其受知眷如此居官清儉夏常服苧葛不施衣章右方伯馬公因宴會潛令針工製青紗易之完感其意服之終身居家孝友遇貧乏輒賙之爲諸生時方貧困父嘗受寄鄉人百金父與鄉人俱歿完密召其子還之既貴始終不渝其操時方冀其大用而完屢跡乞骸骨歸卒于家所著有南遊稿歸田錄今

推祀鄉賢

俞振英字仲英少英敏有奇氣好讀書爲文登進士授安東知縣一日得淮沅浮尸衣夾揚州市緝目曰是必有寃遂遣數人分入群盜中市緝默察其色記相符者貴買之一人得數縑歸與目無二索其舟果得餘縑并所掠少女衣物女言亡官眷屬被害已十口矣獲盜二十餘衆皆伏死人稱神明移官臨淮和易寬平民稱樂業弘治戊申 詔脩

憲皇實錄博采公議振英得以循良附名國史後

丁外艱再補豐城邑大旱申理淹獄露禱不食
明旦大雨民歌曰兩歲無麥今得兩伯丁內艱
補貴溪令平反疑獄不致沉抑擢廣信通判會
有國喪中使逞威所至黷貨振英挺然面折數
其罪狀上下賴之陞陝西兵備僉事以斬虜有
功擢尚寶司卿逆瑾擅權文武將相皆出門下
振英至京或謂曰曾謁劉司禮乎書刺必謙抑
振英再三詰故乃以已刺示振英振英不荅出
曰吾老矣不能借尚方劍尚可俛首奄豎稱小
的乎遂弃官歸天下高之家居甘淡薄鄉人無

異議焉

教澤

國朝周彛字明德洪武初徵授本學教諭陞萍鄉知縣以廉惠稱攻詩文一時名士劉履等皆嘆羨以爲莫及後以方孝孺黨繫獄其友人子呂珮爲代繫死獄中都御史楊信民吏部尚書魏驥皆出門下私謚貞惠先生

章廷端字信臣元季舉鄉試不仕洪武初徵授本學教諭陞福州府學教授爲詩文秀整古雅與呂升呂不用楊溫如諸名賢爲社友所著有耕讀稿

呂迪一名謹字茂恭痛父珮爲其父友死終身哀慕力學能文舉永樂丁酉鄉試授無爲州訓導振明學政士及門者多登第而邢寬大魁天下陞連江教諭鄉達陳宥有才德歿無以葬迪捐俸襄事未老乞歸聚子弟教之遠近踵至俞欽姪昌皆門人歲時飭祀甚謹邑人宗之

呂宗信字廷立性莊重恭謹無一戲言晨興必焚香揖祖考朔望詣大宗祠展拜祭祀竭誠敬博涉諸經子史爲文章嚴整閱深將貢以讓其友越二年乃貢授餘干縣訓導惓惓以孝悌廉

恥不欺爲教諸生莫不愛敬歲時餽遺擇蔬果
尤薄者間受其一陞海康縣教諭轉周藩其門
人皆祠而祝之還家子孫貧甚借兄子一室居
之終日危坐以吟咏著述爲事其所著有性理
解疑天地本原圖及進齋集十卷門人仕浙者
徃徃恤其後孫伯禮應募至海康士夫爲置產
娶妻以居可謂以善教得人矣卒塋雪塘

潘日升字益遜性端敏博學多識師事俞振強
盡得其經學宗旨慕古力於進脩爲諸生即器
重當道郡守南大吉掄入稽山書院與兄日章

同遊王陽明門深究性命之學應選貢任邵武
教諭至則敦禮讓督課程給俸調貧改創黌校
以陽明之學訓迪諸士又著父子兄弟夫婦朋
友四箴俾諷詠之一時士風丕變而關閩之學
復振尋以子晟貴乞休家居杜門謝事日與朋
舊優游山水間講道自樂雅好讀易扁所居爲
玩易窩升持已方嚴處家孝友遇族黨恩禮藹
如邑人無大小咸敬仰之卒祀鄉賢而邵武士
爲立碑請祀名宦所著有貞靜集四卷詳見大
學士呂本墓志厥配石氏亦有賢行善內助焉

文學

宋章一經字清之富于貲而能謙約愛人好施篤志問學建平山書堂聚書千卷延文行之士主師席教子孫絃誦不絕立家規以肅內外其後子孫科名相繼其玄孫文華亦善詩文有南庄稿清俊可觀與呂德升俞原治爲社友蓋博雅士也可謂世濟其美云

石延慶字光錫舊名襲慶登宋紹興二年進士洒落不羈高宗深竒之賜今名任容州司理試中學官轉教授又中博學宏詞科改國子監丞

通判台州

呂大亨字聲之宋宰相正惠公八世孫也以字行與從弟冲之同師止齋陳傅良友蔡行之太學壁記名在陳下蔡上陳蔡既貴大亨猶未釋褐或戲之曰此謂厄于陳蔡之間也久之授宿松尉平盜有聲轉平陽丞時嚴稗提之令大亨上不廢法民尤便之終昭信軍節度推官所著有沃洲雜咏葉水心稱其言近指遠作呂丞行贈之載浙江通志冲之英敏夙成博學精思研究典謨風雅尤工詩文傅良深器之舉進士授

靖海主簿有政聲權南康軍僉判集諸生於白鹿洞書院講明理學諸文學立碑頌其德未幾以疾引退表正鄉閭家無餘貲所著壁經宗旨及詩文墨妙世傳之

國朝徐志文字大華天順八年舉進士授南京工部主事陞員外郎屯田郎中性剛氣和動慕古人與一峰羅倫定山莊杲白沙陳獻章匏庵吳寬諸名公游居官行政甚謹其志則翩然物外也嘗於官舍植竹結茅名曰可亭徜徉詠歌所著與齋稿數百篇皆春融自得定山志其墓一

峰讚其影匏庵寄題其亭皆以學道志仁期之而惜其早世未及見其止也其子壽卿姪雲卿皆以文學世其家嘉靖中提督學校文谷孔天胤行學至新昌考其遺文推祀鄉賢

徐雲卿字光遠少有高志與兄壽卿從定山莊杲游有道學名雲卿承父兄家訓逸邁超群不慕榮貴獵涉書史能通其指要不屑屑為專門訓詁學善文辭尤好吟詠晚年操守益勵徜徉山水間蓋不櫻情於世故者士大夫博士弟子員以其行義列名請祀鄉賢

呂世良字中遂父廷圭有隱德慷慨能詩文所
著有魯翁稿世良夙承庭訓宿儒章士一見竒
之以女字焉既長博覽群籍尤究心周易每讀
一卦輒畫壁間終日端坐默玩不以授諸子曰
夫子晚而傳易孺子未可與言也乃以書授其
子光洵以春秋授光演光泌以詩授光龍其事
親曲致愛敬沒而致思吉凶四禮咸遵晦翁而
建家廟創壁室置宗田辯大小宗各以時奉祀
兼用丘氏儀節遵時制也歲嘗大禋府倅發倉
振饑饉者待哺大闕吏卒盡走府倅亦避匿乃

命演書帛揭以諭饑者饑者即斂而就賑又嘗
與衆濟江將濟風霰大作亟令艤舟江渚活者
數百人其長厚有陰德多類此後光洵爲御史
視京營北虜大入亟遺書戒洵宜致身許國既
而虜退洵得歸省演補學生泌龍皆太學生乃
闢墅芝山之陽日與客徜徉歌詠所著有芝山
稿寄興深遠知言者以爲陶常遺韻云從祀鄉
賢配章氏克閑婦道詳見唐太史順之所撰傳

武功

唐何茂字孔昭青州人仕唐為吳越輕車節度使鎮東海專征討時婺州坑賊連結台温山寇聲勢張甚茂帥師討平之旋師掠温嶺餘寇出險道遇刃賊突擊死之朝議厚恤其家蔭子增幕府參隨

五代胡璟字汝明為吳越錢武肅王偏將與統軍使張筠趙承泰同取福州陞行軍司馬兼尚書退居新昌之湖卜種十里梅花自號梅溪即忠簡公銓之始祖也塋縣東三十里之七星峰下

新昌縣志卷之十一

五十六

厥後其孫棟來新昌拜始祖墓因家焉朱文公與石子重往還偶宿梅溪見忠簡遺像因留題
十年湖海一身輕歸對黎渦却有情
世路無如人欲險幾人到此恨平生棟裔孫曰擇善曰祺洪武天順間俱以人才任縣丞

宋呂定字仲宜宋丞相呂端之六世孫也應洞識韜畧辟授閩州監稅轉秀州監鹽為人英邁豪爽嘗調兵海上口占為詩聞者莫不壯之
談兵膽氣豪折衝千里豈辭勞旌旆影動秋風
肅鼓角聲回夜月高紅錦裁鞍新試馬黃金裝
帶舊懸刀臨征自信軍
容盛五色團花繡戰袍其他若出塞扈駕等作皆氣格雄古有岳武穆之風性至孝痛父集早

卒事母吳恭謹于杜潭置別業百畝奉之以收
魔寇功遷從義郎累官殿前都指揮使龍虎上
將軍

元董彦光雪溪人元至正十六年盜馮輔卿作亂
陷新昌彦光集驍勇屯於境上松木嶺明日盜
擁衆而西遇監彦光與弟舜傳子谷彪廷輔挺
劍直前衆翼以從擒輔卿斬之俘其黨數千人
授武畧將軍兼海道防禦義兵元帥府事佩金
符子弟三人俱授官

章廷珪字禹臣幼負奇氣與弟廷端相師友見

元政日衰隱居龜山抱膝長吟志慕管葛至正
十二年方谷珍叛據城邑民不聊生珪奮然曰
此大丈夫立功秋也遂與從弟廷璋集義兵設
方畧防禦有功俱授萬戶

國朝趙可蘭宋丞相鼎之七世孫國初以武畧從
太祖於金華奇才達識參贊於沔令於郢從政於
朝燕改陞潮陽衛鎮撫初鼎貶潮陽有懷德祠
既燬可蘭至爲修葺之洪武十八年出使甬東
以勞瘁卒于官

隱逸

五代石延翰有大志父渝仕吳越錢氏爲吏部尚書兄延俸封司空獨延翰恥之不仕隱居沃洲結廬於白雲谷以書史自娛號雲和子人稱羽林先生後贈白雲先生

宋石余亨字成已九成其舊字也以文行見稱于時登咸淳進士仕於鄞于衢已而棄官歸沃洲自號休休翁避丙子之亂奔走萬山中更號遁翁平生自喜爲詩文孫璞檢拾遺稿欲鋟梓弗許曰聊以適吾意爾未必名家已而慨然曰吾

新昌縣志卷之十一

五六一

家更八九世皆不失素業至余身益窮今老矣然不辱於盜賊不死於道路獲奉遺體下從先君子于九原亦幸矣因預爲之銘銘曰膠膠乎申申乎將久存以瘁余形乎寧亟歸以全余真乎悲夫

黃惠之字子思重厚尚氣節嘗言曰鬼不誦佛不佞心如秤宣和辛丑方臘盜起焚劫新嵎惠之與弟間行陷賊中能以方畧誘之潰敗其衆朝廷遣郭統制收復論功行賞惠之辭曰破賊藉國威非某力也遂隱不出黃度之長孫也

石揮祖字光遠性惇慤凝懿事親甚孝佐兄明
遠治家政尺帛斗粟不入私房有司科徭身獨
任之雖櫛風沐雨未嘗厭苦曰無以煩吾兄也
癸巳歲大歎出羨餘粟以賙鄉里遭世多故不
復慕仕進惟盤旋烟霞泉石中發為聲詩意氣
冲澹飭勵子弟學問初不以喪亂自廢也宋景
濂為銘墓

石公孺字長孺待旦曾孫為人警敏孝友有經
術高尚不求聞達丞相謝克家禮為國士高宗
詔求遺逸使者朱異薦其長於三傳召對稱旨

命之官固辭高宗曰卿當為朕勉受一官乃授
迪功郎進其所作春秋類例命藏館閣再授監
南岳不就還山

黃竒孫字行素宣獻公曾孫敦行誼有古風師
事俞浙石九成會稽韓明善該博經史聲重一
時避元隱居不仕或勸之應試曰銜玉非吾志
也所著有南明志蚓鳴集及輯祖三朝言行錄
藏于家一日倚門歌曰夜夢逢初度悲懽見我
翁吾其逝矣遂卒

潘音字聲甫幼聰敏日記千餘言博極群書為

文能臻奧理生甫十歲而宋亡見長老談匡山事即潸然涕下及長讀夷齊傳遂擊節憤嘆以事元爲恥日惟杜門讀書談道以聖賢之學自期優游厭飫多所自得其友夏圭孫題其居曰資深堂爲之記後訪弟元甫於義烏會黃晉卿因偕圭孫往從草廬吳澄學澄泰定間以薦召欲行音勸止之不從遂歸築室南洲山中自名其軒曰待清隱居二十餘年謝棄世紛累徵不就日事著述發之歌咏有激昂慷慨之風學者因稱爲待清先生所著有待清軒稿讀書語錄行于世詳見天台戴沈傳

國朝呂不用初名必用字則行嘗應元鄉舉有奇名稍長悟曰吾家世宋臣仕胡非義也遂更名不用字則畊率諸弟躬畊石鼓山下以奉二親繼聞黃先生璫講學金華裹糧從之自六經諸子傳記騷詩以至醫筮星律兵家奇秘之說皆博涉停蓄時撐突爲詩文辯博汪洋出入班馬李杜一時麗靡俳習盡洗與其叔呂升天台陳川徐一夔金華宋景濂青田劉基唱酬往來基微時遊放不羈俗呼爲劉狂不用與遊嗤曰此

子業萎矣何從劉狂遊耶及基翊輔

皇明屢欲薦之以龍龔疾固辭晚年應經明行修辟授本學訓導時亂餘禮經晦蝕率諸生綜釐蒐剔親爲䟽解且訂集朱子家禮行之一時翕然向化復以龔疾告致因自號石鼓山龔後居東岫山又號岫西病牧所著有得月稿牧坡稿力田稿行世載兩浙通誌卒祀鄉賢子稷亦以學行著名

董荆字宗楚忠臣旭之子博學好古長於詩文尤善畫所著有翠微漫稿國初隱居不仕洪武

十七年舉博學宏詞上親問治道稱旨授縣丞辭不就卒

楊居字温如性聰敏篤實不欺貌莊氣温言動皆可師法長詩騷有亦愛齋集宋景濂爲墓銘

章廷端有詩高風自足驚流俗朴行真堪繼昔賢安得子陵江上去釣竿同坐月中船

潘律字孔聲號東溪子曾祖原達元季率義勇保障鄉閭律氣和質粹知圓行方師事胡復齋張汝威習理學日記數千言群經百氏靡不窮貫爲文章多成於腹稿豐贍新麗不類山林所作養親必躬進甘旨母喪凡三閱寒暑不御酒

肉遇諸弟友愛志不事生產以清約自持教授鄉里學徒林立郡守彭公器之延修會稽郡志嘗作豪歌以自况所著有東溪集門人俞振才爲文祭之

呂九成字宗學與兄不用九思並稱三彥自以宋室世臣不肯仕元兩兄倜儻有才名而九成澹泊雅循時時誦說溫公晦庵之書言動由禮不與時移易其後兩兄以徵辟仕

本朝九成猶自隱約不就推舉終身茹淡被䟽弦歌自適頎如也同宗子弟數百千人咸敬事九

成稍未循即命至堂下戒責之皆悚側謝奉教惟謹莫敢諄謾者嘗道拾鏹數千貫立俟其人還之一少年被酒侵九成從者欲歐之九成曰勿校狂兒死無日也已果爲盜所殺嘗戒其子孫勿游市井曰此最壞人心術語載舊志後百餘年浙江叅政胡績宗行部至新昌問邑之文獻乃爲九成立逸民碑推祀鄉賢

甄圭字廷器布政使甄完子也自幼器業不凡立心制行率倣古人隨父宦遊所交皆天下名士後屏居東山築精舍終日危坐其中誦詩讀

書不事進取天順甲申郡邑以經明行脩舉抵京聞父疾棄歸父歿居喪不踰禮時射禮久廢邑令芮思請訂行焉居家儉約田穀所入給歲用外一以賙貧尤慎取予苟非分所得輒曰吾為清白吏子敢自污耶晚年清譽益彰郡伯戴嘗手書賓延之嘆曰先生真可謂聖世逸民矣所著有北遊集東軒稿數十卷其孫昇亦以孝聞于時

胡禎字用良居三十三都甘貧力學尚志慕古鄉黨間聲稱籍籍足未嘗入城市士大夫聞其

新昌縣志卷之十一

六十三

名弗克見結草亭於宅外聚古今圖籍終日吟誦其中不慕仕進所著有草亭愚辨等書古淡平實有關世教與江浦莊杲嘉禾呂原詩文往來監司王華禮幣獎重府推周進隆知縣唐夔皆款門見焉莊杲寄詩曰聖主狂奴自古容溪山此意便無窮誰知宇宙千年病我與先生一樣風越水以東惟剡曲于陵而下幾漁翁間作莫問今誰是時止時行道只同徐壽卿字光岳即中志文之子自幼聰敏好學尚氣節不妄交遊請於父曰兒不能為舉子業取科第願盡讀天下書使立身行已無媿古人可乎父許之乃結如斯亭藏修其中日夜研究

群書至忘寢食既而充然有得乃與父友陳白沙蒞定山輩遊聞見踐履益到舉聲色貨利不以入其心年方壯人咸以巨儒稱之監司及士夫過邑必備禮延見定山尤加愛重作春風亭以居之其詩文賡唱往復備載定山集中

丁徵字允中別號從吾野人天性篤實少習舉子業稍長曰吾非青雲器也遂隱身不出事親長極其誠敬衣冠言動必循乎禮諸大家聞其名聘爲子弟師辭曰親在不敢遠離乃就近舍授學每旦必具衣冠揖父母而後去得一珍珠

必携歸奉親晨昏定省夜必兩起至寢室外潛候動靜雖隆寒不廢途遇諸族父負擔亦拱而立恂恂應對惟謹蚤歲妻亡不再娶見內人必擁面避之宗戚憐其貧或賙給之謝不敢受其子請學星相自給徵弗許曰爲此術必欺人取利但勤耕足矣畜一猪售于人或戲其多取直即追其人十餘里還之其篤行多類此邑宰屢請鄉飲固辭不就萬公必欲賓致之遣車馬督里老敦請乃徒步百里至城老幼聚觀若神物然所著有四書講義詩易註解從吾心說

遺英

宋張壘

公良之曹孫也舊志稱其性孝友長於問學有所撰宗譜及畏齋稿存黃謹為撰狀

國朝潘成章

隱士潘律之父好學修行不求仕進工於詩文有錢塘懷古一律入明詩

選粹為時所傳頌云

張汝威

正統間為邑庠生舊志載其精舉子文尤長於古作邑中及台剡士多從之遊

所著有詩文稿藏于家

章模

醴泉人舊志載其幼穎悟出群五六歲善屬對有試之者隨口而應年十四能作詩

人嘆賞之弱冠補庠生日記數千言目五行俱下文思如泉湧年三十二而卒

呂雍

性冲淡能讀百家書革除間不事進取隱居西河躬耕以奉二親此老貧窶尤甚惟採薪薇以自給人或餽之卻不受為詩文雄贍所著有牧隱集

新昌縣志卷之十一

六十五

呂該

字廷無弱冠善屬文邑宰聞其名召補弟子員托疾力辭作枯梅吟見志益肆力于

六經為詩文頃刻立就草書駸駸逼古性謙和端直間里有不平聞一言輒解御史王潢鑄其名于旌善亭晚避鰲峯萬山中著萬峯稿二十卷

呂世東

少事舉子業以伯仲二兄俱績學種文弗售乃絕意功名讀古書工詩文善各

體行草書年及壯以家務盡屬諸子出遊台温名山適三具探三柳虎丘之勝大嘯狂歌而還

即開戶靜養足跡不履城市郡守邑令多就山房訪之或留飲玄談濱行即拜辭曰山人不敢

入公門報禮云所著有三呂集詳見督學孔天胤所撰墓志

周鏗

縣令周文祥後也性明敏日記書千言善屬文家貧業教授所成就甚多所著有蚓

鳴集

耆德

國朝 呂師賢

字愚卿幼孤鞠于叔父琴山翁欲使

父後乃命他子為之而師賢益孝養不渝叔父

潘惟清

端謹有識量宣德中上司捕剽寇台有

清詣視公牘無其名出以金還之又嘗擒賊得

俞用怡

名然為人厚重方毅涉獵書史事母孝

分置家塾延師教子

俞本原

讀書尚禮父早喪兄出仕弟又失明本

之有司令稽筭糧籍有奇零無歸收入已戶賦

呂存茂

為人謹厚其娣清明早寡無依迎養于

家五十年令諸娣姒皆無粉澤以安娣

李六

心歿備衣棺厝親塋

張寧仲

長潭人修德樹義樂施與臨終焚券慮

潘成佐

名僕七歲喪母哀痛如成人出外得菓

父及嫡母尤謹當道以孝子旌

潘淮

性端嚴甘貧力學行每慕古事繼母孝撫

有爭得片言輒解當道以謹厚

呂詢

自號伴雲翁喜讀書吟咏晚築東溪草堂

隱稿子世舟

俞錫

幼孤事嫡母以孝聞處二兄每事謙讓人

藏姪阡其上即以與姪居常訓子孫

張汝中

孝子觀僧孫也父母早世盡心撫幼弟
暨長為婚配諸幹理悉心任之析產時
兄弟相推讓人為美談白太府下檄嘉
獎年逾八十卒世孫時春亦以謹厚稱

呂颺

以兄獻仕獨居孝養其親訪求先人遺墨
不吝金帛購之呂氏文獻賴焉尤善詩歌
草書郡邑待以賓禮其子
芹亦高尚為時所重焉

吳璞

銅坑人性稟公平喜施與或告以筭乏必
量事調之弘治癸亥歲饑邑令姚隆勸富
民出粟賑濟期秋成抵償璞納穀五百石曰父
母憂民如此某安敢望償令喜之薦與鄉賓固
辭不就

趙經

年十歲為父吮疽既長充廩生母邁風樂
遂乞終養母不耐則日負行於庭無惰容
四世孫天與以篤厚世其家

何峯

天性朴實自幼至老不入縣門年十八喪
偶家頗殷以有子不繼室鄉黨稱為義夫

新昌縣志卷之十一

六十七

邑令屢延鄉飲避不就年九十八
而終其從弟錨亦朴實守分云

俞薜

四邑人博覽經史不慕功名與族黨有恩
義御史王潢檄錄其名于旌善亭

陳景熙

三都人性謹厚自少喪父事母孝躬耕
力養母病瘋手捧污穢及沒哀毀踰禮
有司屢以孝子扁其門

何文

本邑庠生棄業歸養母章百有十歲與弟
唐相孝友邑令屢獎之文年九十七唐年
一百蓋一門者祥云

呂世喬

好義樂施嘗捐田六十畝贍族賙貧助
莖娶又善詩文

王坦

南山人少有隱智長好學慕古富于貲而
能推有餘以賙困乏性行質直鄉人有爭
訟者輒為之頗能詩文尤精於醫術邑令屢
禮為鄉賓其子世儀由庠生入貲補國學誠篤
不欺司成呂公柎甚器重
之官知事亦有清望云

石槐 小將人父病瘋動止不常槐曲為承順十
年不離左右父卒火起槐抱棺籲天返風
而免至塋結廬墓次

呂世風 十六喪父讐家以主使謀殺人誣其兩
兄兩兄皆在庠世風即以身代就逮踰
年事始自治家有規獲家累千金終身與物無
忤或利人亦不任受德訓子光化以文行云

俞邦彜 嘗讀書涉文辭以母病遂閱醫方以奉
台寇鸚抱母涕泣寇釋去居鄉恂恂長厚里中
惡少望見杖履輒避匿嘗訓子尊賢以無忘先
德克樹

王芬 下醴泉人父邁奇疾坐卧不安芬曲意承
順卧榻外環列諸榻惟意所指時負而赴
馬或手取便溺歷十載不怠父病革手書真
孝二字及卒廬墓三年郡邑賓禮之為表石

章景昭 名暎醴泉人性方嚴不妄交與事繼母
能致孝敬父分產以妻資足給讓弗取

新昌縣卷之十一

嘗調貧乏助婚喪歲凶
出粟賑饑縣立兩旌之

丁鈇 南洲人行誼端慈斥餘資均族助塋贍學
邑鄉賓之賜扁着祥給冠帶年九十六

丁選 南洲人事親以孝親沒泣血廬墓遠近哀
感讀書解大義屢延鄉賓名人贈咏甚多

陳太震 前山根人性敦厚居家教子孫務循禮
法鄉族稱之

俞則時 性嚴直好施予嘗捐田十五畝贍學及
還妾以全義塋婦以教倫為人所稱焉

潘最 少向學以弟晨貴棄就養教孝友捐田供
祭出粟賑飢以吟咏自適訓七子皆業儒

劉炳 三涇人鄉有朱母嶺險峻炳砌路建庵捐
田為給漿費嘗賑饑塵枯骨創古松橋鄉

人義之

附封贈

五代石昉

以子渝貴贈節度使加太保

宋石渥

以子待聘貴贈大理評事

呂集

以子定貴贈都指揮使

俞君澤

以子公美公浙貴累贈朝散大夫

石待聘

以子象之貴累贈光祿卿

呂琰

以子元之貴贈宣教郎

潘子廣

以孫來貴贈朝奉郎

黃仁靜

以子度貴贈朝奉大夫

潘恩

以子來貴贈朝請郎

新昌縣志卷之十一

李九

呂瑾

以子冲之貴贈承奉郎

潘清

以子勝貴贈都虞侯

呂惟通

以子秉南貴贈朝散大夫

王迥

以魯孫煥貴贈太子太保信國公

王應辰

以孫煥貴贈太子太傅魯國公

王夢得

以子煥貴贈太子太師衛國公

國朝王德成

以子溥貴贈刑部郎中

楊文吉

以子信民貴封給事中

章魯臣

以子良民貴贈給事中

甄得禮

以子完貴累贈參議

陳克讓 以子孝軻貴封知縣

章胥民 以子敏貴封主事

呂存政 以子昌貴累贈僉事

俞叔晦 以子鐸貴封主事

潘確 以子成貴贈經歷

丁孟達 以子川貴贈順天府丞

呂存酌 以子鳳貴贈主事

俞用貞 名良以孫欽貴封禮部侍郎性純篤痛

母丁失明事之惟謹疽發背親為洗視生母童
喜佛書為建禮佛堂以適之歲饑民肆剽奪有
司逮捕數十人將寘于法用貞力庇獲免大學士
為讐家所誣脫身來歸用貞力庇獲免大學士

新昌縣志卷之十一

七十

商輅為撰
神道碑

俞廷獻 以子欽貴封侍郎

徐景釗 以子志文貴封主事

呂茂常 以孫獻貴贈侍郎

呂景明 以子獻貴累贈侍郎

何遵道 以曾孫鑑貴贈太子太保尚書

何彥廣 以孫鑑貴贈太子太保尚書

何崇美 以子鑑貴贈太子太保尚書

劉永華 以子忠器貴封御史

何崇文 以子錫貴贈通判

俞叔安

以子振才貴封御史

呂廷潤

以子大川貴封知州

潘孔平

以子沐貴封御史

俞溥

以子集貴贈監察御史幼警敏嗜學嘗遊吳中遇險濤遂絕意仕進事父母克盡孝敬與鄉人居恂恂然不以父兄貴宦而有驕色與人交易寧厚其直遇橫逆直受不校有數盜竊其穀既獲而釋之戒無復犯元旦有大蛇蟠於中堂衆曰火兆也溥乃焚香祝天且曰使溥罪果難赦則願火止一家無延鄰屋後亦不火其厚德多類此子集柔孫時歿時及相繼登科第人皆謂溥種德之報云卒塋五峯烏臺門山與子集合兆

俞廷佐

以子振強貴封文林郎

俞鐸

以子深貴封進階正治鄉

新昌縣志卷之十一

十一

俞貴鎔

以子綾貴封經歷

俞振忠

以子朝安貴贈給事中

呂廷圭

以姪孫光洵貴贈尚書事與子世良同傳知府南大吉為善石表下金山之墓

呂廷安

以孫光洵貴贈尚書

呂世良

以子光洵貴贈尚書有傳

潘憲朝

以孫晟貴贈尚書有傳

潘日升

以子晟貴贈尚書有傳

俞朝寰

以子則全貴封文林郎安福知縣性孝友淳篤閨閣內有隱行母制于寵妾寰迎歸獨養曲為承順兩得其懽心購田宅輒為諸昆所奪擊至折手無怨言享華腴每念弟輒泣下蓋古薛包氏之流亞云

呂苗

以子仲景貴贈通判

呂益宗

字應鐘以子若愚貴贈行人司左司副

性誠篤不欺居家敦孝義嚴禮節待人
曲有恩意口不言人過與後進語懇懇歸於忠
厚名其子姪曰若愚若柔若虛若訥等以示教
子若愚輩亦振振循矩矱也每觀書史遇格言
輒書憲壁以自警晚築精舍於居旁日以琴詩
自娛臨終自挽一律有曰形骸總喜全歸地腔
子從來不媿天云親友咸和而哀之葬南門外
龍巖山

恩蔭

宋石晝問 以父直諫死蔭

呂億 以父死難蔭大理評事

王夢錫 以兄夢龍蔭

呂光 以祖秉南蔭以上俱見舊志

國朝楊玘 以父信民蔭泮鄉縣縣丞

俞沆 以父欽蔭府照磨

何容 以父鑑蔭錦衣衛百戶

呂仲杲 以祖獻蔭授真定府通判摘發奸宄范

肅皇南巡倉卒庀具供應之趙州 皇殿火懸金募構不日而成時同官皆科甲仲杲以才能獨

新昌縣志卷之十一

七三

署府篆薦陞 祈州知州卒

何九臯 以祖鑑蔭世襲錦衣衛斧鉞司百戶

呂應岩 以父光洵蔭

潘復泰 以父晟蔭

鄉賢總論

論曰人以賢稱豈易得哉必才德邁衆斯人從而賢之也賢而曰鄉非局於鄉也以其生於鄉就所近而稱之耳由一鄉而一國由一國而天下由天下而古今其致一也孝可以為忠弟可以為順家理可以治官其道一也故不問其顯與晦也而並列之於鄉賢尊有德也其或造羽濫觴使人有所適間焉則顯者不如晦者之自完而錄者又不如遺者之無失矣吁尚慎旃哉

